

摘藻堂四庫全書薈要

集部

欽定四庫全書薈要

御定歷代題畫詩類卷七十二目錄

樹石類

戲為韋偃雙松圖歌

唐杜甫

泉石雙松圖

元王惲

南岳李道士畫雙松圖

元宋元

鄭克剛雙松圖

元黃鎮成

韓伯清所藏子昂雙松便面

元黃玠

衍師道原雙松圖

元黃玠

題項可立雙松圖

元柳貫

題夏迪雙松圖

元王冕

題曹雲西雙松圖

元陶宗儀

巧石雙松圖

明楊基

雙松圖

明周致堯

二松圖

明張元禎

孤松圖

明貝瓊

五松圖

明廖道南

山壑萬松圖

元王惲四首

題履元陳君萬松圖

元楊維禎

萬松圖

明金幼孜二首

題盤松扇頭

元張天英

題秦中李資谷黃門偃松圖

明董其昌

怪松

明李日華

題雲松巢圖

元陳旅

題倪幻霞雲松圖
元成廷珪

題松雲卷
明王世貞

大簡之畫松風圖
元元好問

題松雪圖
元范梈

松月圖
明程敏政

招徐宗偃畫松石
唐張祜

松石曉景圖
唐陸龜蒙

觀裴秀松石障歌
唐僧皎然

依韻和原甫省中松石畫壁 宋梅堯臣

次韻劉貢甫學士畫松石圖歌 宋蘇轍

題松石圖 元黃玠

松石圖 元吳鎮

題曹雲西畫松石 元倪瓚

題松石 元丁立

題松石圖 明張以寧

題作小幅松石 明李日華

題趙子昂松石修篁圖

明貝瓊

次韻喻叔奇松竹圖

宋王十朋

題松竹桂梅

明解縉四首

席上賦老松怪柏圖

元李材

僧蓮松檜圖歌

明王逢

題楊補之松檜圖

明程敏政

題松菊

明張鳳翼

徽廟古松山鵲

明金幼孜

題趙希遠畫蟠松玉兔圖

明僧大圭

寄畫松僧

唐王建

題壽老人松年圖

元張憲

三友圖

元劉永之

歲寒圖

明解縉

歲寒三友圖

明吳寬

歲寒三友圖

明許繼

三友圖

明朱經

皇甫松竹梅圖

元張伯淳

松竹梅

明徐渭

霜林晚節圖

明周旋

乞荆浩畫

唐僧淨顯

題金陵陳時舉宅畫壁

元謝應芳

題吳祠部畫

明董其昌

欽定四庫全書薈要卷一萬九千一百八十

集部

御定歷代題畫詩類卷七十二

樹石類

戲為韋偃雙松圖歌

唐杜甫

天下幾人畫古松畢宏已老韋偃少絕筆長風起纖末
滿堂動色嗟神妙兩株慘裂苔蘚皮屈鐵交錯迴高枝
白摧朽骨龍虎死黑入太陰雷雨垂松根胡僧憇寂寞
龐眉皓首無住著偏袒右肩露雙腳葉裏松子僧前落

韋侯韋侯數相見我有一匹好東絹重之不減錦繡段
已令拂拭光凌亂請公放筆為直幹

泉石雙松圖

何直
長筆

元
王
惲

江煙霏霏江雨濕滿壑秋風蕩虛壁何公雖老筆有神
寫出雙松蔭泉石君看磊落橫澗枝黑入太陰凝積鐵
他時不作澗窟蚪定向風巖聞虎裂煩君十襲為深藏
隄備六丁來電掣

南岳李道士畫雙松圖

元
宋
无

道士醉臥天柱峰睥睨石上千年之老松松精相感入
夢寐化作蒼髯雙老龍酒腸空洞生鱗角飛出兩龍醉
不覺須臾霹靂撼五岳豐隆縮手不敢捉神靈頃刻歸
虛無壁上但見雙松圖松耶龍耶莫能詰棟梁霖雨藏
秃筆

鄭克剛雙松圖

元黃鎮成

老榦懸霜紫翠分一山風雨半空聞攜琴欲埽苔根石
為寫秋聲寄白雲

韓伯清所藏子昂雙松便面

元黃玠

并刀剪水一尺餘，照見亭亭兩松影。
玉堂學士自寫真，令我悽然發深省。
聳壑昂霄五十年，健筆如錐有鋒穎。
蒼髯磔怒知誰嗔，老節猶將見奇挺。
直幹斜分水墨痕，樛枝亂結風霜頂。
龍鸞已化毛骨殘，雷雨欲來崖谷暝。
兔絲縣蔓待茯苓，迴首餘光惜俄頃。
會稽公子多苦心，收拾新詩題小景。

衍師道原雙松圖

元黃玠

小石如拳大如癭石上亭亭松樹並誰從山陰得繭紙
幻落毫端寫雙影風雷太古見植立冰雪平生慣淒冷
下有茯苓千歲根可為人間駐流景

題項可立雙松圖

元柳貫

我家庭下有雙松絡石攬雲與此同閉戶時時聞落雪
援琴往往寫清風神全省識蛟龍狀墨守誰爭篆籀工
採藥天台能事在故應添著負苓翁

題夏迪雙松圖

元王冕

我昔曾上五老峰白雲盡處看青松中有兩樹如飛龍
正與夏迪畫者同夏迪畫松得松趣箇箇乃是廊廟具
貞固不特凌雪霜偃蹇猶能吐煙霧蒼髯獵獵如有聲
鐵甲半掩苔花青六月七月炎火生對此似覺形神清
丈人兀坐誠有道豈比商山采芝皓有琴有琴不須彈
而今世上知音少

題曹雲西雙松圖

元陶宗儀

泖雲西畔一詩翁畫法營丘理趣融四十年前經此地

雙松無恙草堂空

巧石雙松圖

明楊基

松蟠怪誕龍形矯石嵌玲瓏雪膚巧何事淋漓水墨圖
高堂六月秋風早秋風吹雲山脚動瀑布飛來濕瑶草
翠幹危撐日月低霜根倒插雷霆繞山中黃葉已蓋地
獨有煙蘿青裊裊夕露猶含碧海秋春霞已破丹山曉
平生愛松并愛石何異江鳬得蒲藻醉裏徂徠若可登
人間草木慙枯槁豫章將軍顏色好十年走馬淮陰道

索我題詩寫壯懷詩成已覺松杉老

雙松圖

明周致堯

鑿鑿岷峨插彼蒼海波不動海天涼雙蛟化作神仙去
明月中宵劍影長

二松圖

明張元禎

兩髯如龍入雲去白日空庭作風雨根著九地拔不起
留與乾坤作雙柱千丈兔絲千歲苓南山翠色同崢嶸
岳陽城南老髯精驂鸞追逐呂先生

孤松圖

明 貝瓊

峨眉古松寒不死曾見仙人三洗髓霜摧雨剝雷震餘
千尺老蛟鱗甲紫城南桃花千萬株亂後一株今亦無
長身獨立何偃蹇正直自是神明扶

五松圖

為劉太常
汝忠題

明 廖道南

我聞賢哉五大夫乃在泰山絕頂之東隅秦封漢禪幾
千載云胡京郎開瑤圖大夫昔隱雲門山食精餌實栖
仙關虬根百尺結玄窟鸞枝千仞蟠蒼顏大夫今登石

渠閣牽蘿偃蓋承天澤雲來絕嶠時從龍月上層臺夜
巢鶴吁嗟對爾長陰森深春麗景穿遙林幽枝不改歲
寒操勁節真懷太古心此時此地歌此曲維石巖巖五
株綠願引滄浪萬頃波長日虛堂媚幽獨

山壑萬松圖

四首

元王惲

尋龍落落不凡材萬壑蒼煙鬱未開絕似澗阿幽隱士
苦嫌塵土不歸來

巖風謾謾泛秋聲展放橫披眼便明酷似龍門山正北

兩崖陰合記經行

大厦欹傾要棟梁萬材於此鬱蒼蒼正須叮囑工師輩
為楠為櫟細選量

構厦先論大匠賢宋楹桷闌不相捐何當剪伐長材外
乞與坡仙作竈煙

題履元陳君萬松圖

元楊維禎

紫芝道人天思精南來新畫青松障東家畫水西家山
積棄陳縑忽如忘突然槎牙生肺肝元氣淋漓迫神王

亟呼圓瓦倒墨汁盡寫髯官立成仗羣爭十丈百丈身
氣敵千人萬人將交柯玉鎖混鱗甲屈鐵金繩殊骨相
石鬪雷霆白日傾雨走飛龍青天上前身要是僧擇仁
五百蜿蜒見情狀天台老林亦畫松三株五株成冗長
我家東越大松岡五鬣蒼蒼鬱相望門前兩箇赤婆婆
上有玄禽語相向雕龍梓客朝取材伏虎將軍夜偷餉
安得射洪好綃百尺強令渲陰森移疊嶂鼓以軒轅之
瑟五十絃共寫江聲入悲壯

萬松圖

二首題寄
幼學賢弟

明
金幼孜

一別鄉園廿四春
種來松樹已成村
寄言孫子須培植
剪伐無令及本根

種得長松萬箇多
連山數里暗煙蘿
何時投老歸鄉曲
分我寒巖翠一坡

題盤松扇頭

元
張天英

曾障西風庾亮塵
支撐眼底妙輪囷
屈將千丈虬龍質
一握生綃敢望伸

題秦中李質谷黃門偃松圖

明 董其昌

當年高隱傲千峰，搜得峨眉偃蓋松。
出壑蒼龍呈怪狀，游空雲鶴見遺蹤。
居然玉局銘三植，不向金泥羨五封。
顧我亦銜風木恨，并刀一為剪吳淞。

怪松

與秦
心卿

明 李日華

青銅纏皮鐵勾搭，三萬年前綠一髮。
月高映我琥珀珠，鶴來踏枝踏不著。

題雲松巢圖

元 陳旅

匡廬多白雲亦有松在山高樓若槽巢乃在雲松間
茯苓生砌石雨氣通林巒遊子涉遠道夕鳥栖簷端終期
謝主組歲晚適幽歡臥聆松風細起看川雲還

題倪幻霞雲松圖

元成廷珪

九峰只在泖雲西松下來尋隱者棲隱者不歸空見畫
滿山風雨夜猿啼

題松雲卷

贈王明府

明王世貞

君侯燕坐琴堂上琴底雲生萬壑松松愛芊眠時借色

雲憐罨靄不辭封三江地僻催棲鳳二室天空起蟄龍
服餌異時須待汝為霖今旦莫從容

大簡之畫松風圖

為脩端卿賦

元 元好問

董元老筆鬱盤盤萬壑蒼雲復此看絕似鳳凰山下路
秋風無際海波寒

題松雪圖

元 范梈

傍人不識歲寒松憐殺深山大雪封待得化為東海水
青天白日睡蒼龍

松月圖

為陳高士題

明程敏政

綠釵搖影見分毫
露下空庭月正高
禮罷夜壇頻側耳
一天涼籟洗秋濤

招徐宗偃畫松石

唐張祐

咫尺雲山便出塵
我生長日自因循
憑君畫取江南勝
留向東齋伴老身

松石曉景圖

唐陸龜蒙

霜骨雲根慘澹愁
宿煙封著未全收
將歸與說文通後

寫得松江岸上秋

觀裴秀松石障歌

唐僧皎然

誰工此松唯拂墨巧思丹青營不得初寫松梢風正生
此中勢與真松爭高柯細葉動颯颯乍聽幽颺如有聲
左右雙松更奇絕龍鱗麈尾仍半折經春寒色聚不散
逼座陰陰將下雪荆門石狀凌瑱璫蹙成數片倚松根
何年蓊蓊苔黏跡幾夜潺潺水擊痕裴生詩家後來客
為我開圖玩書石對之自有高世心何事勞君上山屐

依韻和原甫省中松石畫壁

宋 梅堯臣

山林與城闕事物不相對
唯聞秉道義所處無內外
趨煩而毀靜此理乃俗輩
昔有天下賢喜得名筆會
買粉塗南牆松石生屋內
石怪如春濤松偃如起籟
畫來二十年數偶未輒愛
罕親憑案顏但覩抱牘背
雖當省闥嚴晦昧欲何賴
今逢茂陵人獨唱亦豪邁

次韻劉貢甫學士畫松石圖歌

宋 蘇轍

長松大石生長見
竭遊塵土嗟空羨
寒翠關心失舊交

榮華過眼驚流電破繒買得古畫圖遺墨參差隨斷線
樛枝倒挂風自舞直榦孤生看面面故山舊物遠莫致
愛此隨人共流轉物生真偽竟何有適意一時寧復辨
少年所好老成癖傍人指笑嗟矜衒京城宅舍松石希
買費百金猶恐賤

題松石圖

元黃玠

毫端水墨影紙上松石神老節委地盡怪態與時新寫
物要有似開卷知其人

松石圖

元 吳 鎮

硯池漠漠吐墨汁蒼髯呼風山鬼泣濤聲破夢鐵骨冷
露影濡空翠毛濕徂徠千樹老雲煙湖山九里甘蕭瑟
何當閱此明牕下長對詩人弄寒碧

題曹雲西畫松石

元 倪 瓚

雲西老人子曹子畫手遠師韋與李衡門畫掩春長閑
搖毫動筆長風起葉藏戈法枝如籀蒼石庚庚橫玉理
庭前落月滿長松影落吳松半江水

題松石

元丁立

匡廬道士山陰住
遶屋青松箇箇長
溪上一番春雨過
白雲滿地茯苓香

題松石圖

明張以寧

繫松之蒼繫石之剛
曷以比德維士之良
有蒼者松有剛者石
繫士之良維以比德

題作小幅松石

明李日華

小暖乍得雨
春松如膏沐
幽蘭雪後叢
隱隱動芳馥
拂

拭松下石莓苔破新綠鳥雀亦未知聊以怡余獨

題趙子昂松石修篁圖

明
貝瓊

白髮王孫老薊門逢人只說山中趣酒酣落筆有天機
寫作陰厓百年樹一株偃蹇龍蛇影繞屋風聲三伏冷
流脂入地成琥珀死骨經雷縮人癭森森竹石俱蒼然
一日坐我天姥前王孫跨鶴歸何年山空月明啼杜鵑

次韻喻叔奇松竹圖

宋
王十朋

只應王子猷相愛未許秦皇帝可尋畫我同年作三友

歲寒節操宰官身

題松竹桂梅

四首

明解縉

石上春松百尺長
松花落澗水生香
丁寧樵斧休戕伐
當待他年作棟梁

脩篁解籜出林梢
勁節扶疎長鳳毛
傳待他年堅似玉
栽竿東海釣金鰲

桂樹團團翠欲流
靈根原自月中求
西風吹動黃金粟
散作人間富貴秋

瀟灑寒梅吐玉葩
暗香浮動老仙家
應知鼎鼎調羹味
幾向園林傲雪華

席上賦老松怪柏圖

元李材

仙人解衣礪礪羸
造化慘澹秋毫端
枝柯千尺入層漢
笙簫萬壑鳴驚湍
堂中日月不可老
壁上雷雨何當乾
我來醉臥北牕下
夢跨黃鵠天風寒

僧蓮松檜圖歌

書遂昌山人
鄭明德序後

明王逢

蓮公畫稱東吳精
草蔓花房未嘗寫
森張意象亭亭表

輒有神人助揮灑常州貌得劍并松劍氣曠溫相鬱葱
膏流節離禍幸免至今顏色青於銅孔廟之檜尤砒砢
地媼所守龍所窟藥柯落陰根走石疑是忠臣舊埋骨
松兮檜兮豈偶然陵霜轢雪兵燹年箭痕刀瘢盡皸裂
用命欲挂將崩天王姚憑城親被堅身殲城破百代傳
無人上請配張許日夜二物風雷纏鄭君鄭君古君子
此文此畫良有以我題短章非鬪靡用弔忠魂附遺史
吁嗟烈士長已矣

題楊補之松檜圖

明程敏政

五松已受秦封辱六檜復被秦名污參天直幹尚如此
二雛已滅隨煙蕪大夫偽號若芻狗處士雄心射牛斗
眼前便覺風雨來耳畔疑聞蟄龍吼良工此圖筆意精
王孫一購千金輕恨無大手如子美為賦成都古柏行

題松菊

明張鳳翼

雲松自是徂徠樹霜色猶存彭澤花莫道西風便蕭瑟
秋容偏在野人家

徽廟古松山鵲

明金幼孜

松梢盤拏出巖壑一夕山風吹子落幾迴度澗聽松聲
橫枝忽見飛來鵲翠衿紅觜一何奇誤疑青鳥降瑤池
根深茯苓不易斲王母羽蓋今何之宣和宮中迹如埽
胡沙漠漠天地老莫向松間占鵲聲五國城荒長芳草
題趙希遠畫蟠松玉兔圖

子昂趙公鑑記

明僧大圭

天水王孫重毫素愛寫蟠根萬年樹上有徂徠五色雲
下有中山雙白兔清陰散作秋滿林咫尺高堂起煙霧

丹桂吹香野菊黃
玉葉金枝亂無數
迢迢錦水泛蒼鳬
漠漠青天飛雪鷺
人間畫手非不多
自是王孫得真趣
浮玉山人列仙侶
雅與王孫同出處
妙畫題來字字真
兵後收藏乃奇遇
宣和遺譜世莫傳
艮岳荒涼風景暮
眼中人事已非前
畫裏江山尚如故
老我披圖一愴然
落日長歌弔南渡

寄畫松僧

唐王建

天香寺裏古松僧
不畫枯松落石層
最愛臨江兩三樹

水禽棲處解無藤

題壽老人松年圖

元張憲

我昔湖上看眠松蟠屈蒼龍陰十畝青天晝暝雷雨黑
白日猶疑鬼神守却憶僧前如雨落春雨新秧不盈握
如今合抱復蔽牛偃蹇輪囷臥丘壑松下老僧金骨仙
親手種松忘歲年倒持一尺白鸞尾拄頰聽風當晝眠
茯苓作粥粉作餅干斛松醪供醕酏不用飛丹駐玉顏
前身自是陶弘景

三友圖

元 劉永之

冰髯玉節間苔枝瘦影參差落墨池
最憶山陰殘雪裏
西窗相對鬢如絲

歲寒圖

明 解縉

羣芳搖落盡凋殘惟有孤根耐歲寒
為道滄洲深雪裏
獨留蒼翠與君看

歲寒三友圖

明 吳寬

檜生巖壑裏凜然歲寒姿
衆卉豈不好貞心
少相知南

望庾山麓北瞻淇水湄氣味雖膈合猶恨道遠而生綃
纔盈丈一旦聚於斯匪藉縮地術良工親手移能事出
腕指託物由心思邪人多黨與蔓草難芟夷正士每特
立嘉樹不附麗時或倒置之山苗反離離維此一堂上
霜雪同襟期聊因草木類竊比唐虞時后稷既在位繼
以契與夔紛紛共鯨鯨末路將何為

歲寒三友圖

明許繼

孤標鬱深翠勁節挺寒綠復此雪後花娟娟瑩如玉風

霜慘陽林冰霰沍陰谷枯悴紛相藉於茲見高躅貞心
諒已同盟好在幽獨轉念繁華姿中道何反覆

三友圖

明朱經

冰雪淡相看心期許歲寒莫同桃李伴容易及春殘

皇甫松竹梅圖

元張伯淳

三友亭亭歲晚時政緣冷澹易相知何須近舍今皇甫
却向圖中覓補之

松竹梅

明徐渭

朱碧嬌啼二月鶯却都輸與此三君若添明月孤來鶴
踏亂松尖一片雲

霜林晚節圖

明周旋

朔風何蕭蕭嚴霜亦皓皓維此歲寒陰羣芳盡枯槁
彼貞堅姿幽寂能自保春風桃李花樹下蘼蕪草紛紛
競顏色媚此一時好

乞荆浩畫

唐僧淨顯

六幅故牢健知君恣筆蹤不求千澗水只要兩株松樹

下留盤石天邊縱遠峰近巖幽濕處惟藉墨煙濃

題金陵陳時舉宅畫壁

元謝應芳

雙松歲寒姿卷石太古色我昔山中遊憩此松下石松
花雪霏霏松葉風瑟瑟安知此清景相對復今日撐空
兩髯龍還在書中室主人罷鳴琴晏坐室生白客來苦
炎熱倚樹欲挂幘不聞天籟鳴但見空翠滴煩襟頓如
洗林壑幽興適經月數相過明朝有行役黃埃赤日中
令人轉相憶

題吳祠部畫

明董其昌

居然張璪偃松圖一一潛蚪若可呼為問寒林風謖謖
何如千樹在玄都



御定歷代題畫詩類卷七十二



總校官庶吉士臣侍朝

校對官庶吉士臣徐如澍

謄錄監生臣楊搢

欽定四庫全書薈要

集部

御定歷代題畫詩類卷七十三

四

詳校官原任事
臣李斯咏

欽定四庫全書舊要

御定歷代題畫詩類卷七十三目錄

樹石類

題畫柏

唐吳融

黃華畫古柏

金密公璫

題李遵道畫古柏

元張天英

竹齋學士作柏圖

元黃玠

禹柏圖

元程鉅夫



韓吉父座上觀漢陽大別山禹柏圖 元吳萊

禹柏圖 元吳師道

雙柏圖 元陳樵

題東坡畫古柏怪石圖 金趙秉文三首

柏石圖 宋蘇軾

題巨然泉巖老柏圖 金趙秉文

題畫 明董其昌

八檜圖 宋王令

畫檣 元虞集

題華氏瑞檣圖 明高啓

題老檣圖 明姚廣孝

題白石翁畫虞山古檣 明張淵

題王學士所藏王孟端老檣蒼崖圖 明曾棨

題沈啓南畫虞山致道觀昭明手植三檣初名七

星檣 明王世貞

古杉行 元傅若金

跋理宗題馬麟畫折枝木犀圖 元王惲

題曹雲西桂根圖 元黃玠

題江亭柳色圖 元丁鶴年

題吳宮衰柳圖 明袁凱

題便面畫新柳 明李日華

倣倪迂河橋新柳 明李日華

題畫柳 明董其昌

題自畫梧石 元唐肅

題梧石

明劉崧

題浦人畫梧桐竹石

明程本立

題梧竹奇石圖

明桑悅

題浦舍人梧竹圖

明趙迪

畫樹後呈濬師

唐劉商

于祕校示郊園棠木連理圖偶題長句

宋劉叔貢

畫樹

元馬祖常

題惠崇畫樹林

元馬祖常

題初士元所畫雙樹圖

元釋良琦

題陳大宅方壺子層層雲樹圖

明周玄

百樹送青六景

明魏時敏

癸亥五月寫江干七樹

明李日華

陳仲美夏木圖

明張羽

祝孝友作枕屏小景以霜餘茂樹名之因題此詩

宋朱子

許道寧寒溪古木圖

元元好問

海岸古木圖 元王惲

畫古木 元馬祖常

題畫古木 元虞集

畫古木 元虞集

商德符畫幽篁古木 元虞集

王晉卿古木 元楊載

題王若水為仙都宮主趙虛一畫蒼厓古木圖 元

柳貫

題山莊所藏東坡畫古木圖 元歐陽玄

奉題達兼善御史壁間劉伯希所畫古木圖 元傅

若金

題趙仲穆怪石竒木 元張翥

息齋竹石古木 元張翥

題怪木圖 元貢師泰

鄭禧之古木圖 元鄭元祐

夜作古木怪石因題 元倪瓚

為何彥修題縣厓古木圖 元劉永之

題古木幽篁圖 元劉永之

雲林古木 元唐肅

題郭天錫畫古木 元張天英

畫古木幽篁 元丁鶴年

怪木竹石圖 明施敬

古木寒藤圖 明沈周

郭熙畫木 元虞集

欽定四庫全書薈要卷一萬九千一百八十一

集部

御定歷代題畫詩類卷七十三

樹石類

題畫柏

唐吳融

不得月中桂轉思陵上柏閑取畫圖看煩紆果冰釋桂
生在青冥萬古煙霧隔下蔭玄兔窟上映嫦娥魄圓缺
且不當高低圖難測若非假羽翰折攀何由得天遠眼
虛穿夜闌頭自白未知陵上柏一定不移易有意兼松

茂無情從麝食不在是非間與人為憤激他年上縑素
今日懸屋壁靈怪不可知風雨疑來逼明朝歸故園唯
此同所適回音寄團枝無勞惠消息

黃華畫古柏

金
密公璫

黃華老人畫古柏鐵簡將軍挽大弨意足不求顏色似

荔支風味配江瑤

鐵簡萬戶以
神射名天下

題李遵道畫古柏

元
張天英

古柏亭亭一虎臣風雲長遶臥龍身石根霜幹心如鐵

欲向曹瞞埽戰塵

竹齋學士作栢圖

得之李好古野齋平章舊物也

元黃玠

薊丘學士神仙人詞翰揮毫有餘力清風披拂盡琅玕
日費尚方三斗墨昔年乘傳向蠻邦修竹如雲楚山夕
却迴官舸過湘中江雨推蓬寫寒碧遠勢聯翩數十枝
顛倒縱橫鳳鸞翼天機到處物變盡雲影紛紛灑人黑
想見走筆如飛龍山木水蘿俱辟易不辭遺蹟購千金
此卷於今妙無敵

禹柏圖

元程鉅夫

我昔觀風江漢域大別寺中觀古柏皮空骨立二十尺
扣之鏗然若金石雙龍盤拏爪角怒白晝歛恐風雷黑
小枝旁出勢蜿蜒復似游龍顧深澤蒼蒼數葉森北向
貞心不受螻蟻蝕我時見此獨驚怪僧言相傳禹所植
別來夢寐常髣髴恨不圖之堂上壁安南國王住漢陽
府中好事黎侯則皇慶元年同入覲忽持墨本來相覓
開緘蕭蕭朔風起半幅生綃萬鈞力恰如大禹䟽鑿時

天斧雷礪鬼神役自言得之寺僧手寺僧得之故侯宅
舊本模糊鎖暗塵上有東坡手題墨臨摹欲遣天下知
國王命我來索詩此柏會有摧朽日此卷豈有消磨時
我聞此語坐太息神禹至今幾興衰人間老樹亦無數
此樹應以人而奇門前馬鳴君欲歸黃河東去浮雲西
歸語山僧謹護持莫令此柏凌空飛

韓吉父座上觀漢陽大別山禹柏圖

元
吳 萊

大別名山如伏鼇大別古柏如立猱舊聞夏后手所植
直軋南國無蓬蒿洪水曾當洺洞極聖躬乃此胼胝勞
乘舟荆衡地可盡作貢雲夢天爭高一時栽櫛託所歷
千載摩撫繫其遭本根盤拏屹巔負枝葉挺拔森旌旄
礙日吟風聳楚阻欺霜傲雪塵秦饕夜行夏首影弄月
曉艤鄂渚聲吹濤信哉冥靈欲等壽材比楨幹終稱豪
屏除緇翳虎豹泣鎮斷夔魍蛟龍逃匠石徘徊却喪斧
篙工睥睨寧維舫吾知嘉木辨爾雅但惜芳草遺離騷

平生環轍苦未到幸此畫筆何從操豈非神明護正直
使在方漢雄城壕樓桑出牆尚久特巨櫟蔽社猶堅牢
惟茲所重有聖德坐見餘物真秋毫自來劉李富宮室
命下荆蜀刮土毛一榮一枯驗世道勿翦勿伐臨江皋
穆滿蒼茫黃竹詠重華慘澹蒼梧號逖然萬古萬萬古
西望嘆息同霑袍

禹柏圖

元吳師道

柏貢荊州任土風漢陽遺樹尚葱蘢休誇此是曾親植

四海青青盡禹功

雙柏圖

元陳樵

亭亭山上柏柯榦如青銅蒼古拔俗姿肯作兒女容風
霜日搖落萬木為之空爾獨不見摧屹立如老翁乃知
歸根妙生意恒內融願乘雷雨興化作雙飛龍

題東坡畫古柏怪石圖

三首

金趙秉文

荒山老柏枿擁腫相伴醜石反成妍有人披圖笑領似
不材如我終天年

人生散材如散木槁死深山病益奇放出參天二千尺
安用荒藤纏繞為

東坡戲墨作樹石筆勢海上驅風濤畫師所難公所易
未必此圖如此高

柏石圖

并序

宋蘇軾

陳公弼家藏柏石圖其子慥季常傳寶之東坡居士
作詩以為之銘

柏生兩石間天命本如此雖云生之艱與石相終始韓

子俯仰人但愛平地美土膏雜糞壤成壤幾何耳君看
此槎枒豈有可移理蒼龍轉玉骨黑虎抱金柅畫師亦
可人使我毛髮起當年落筆意正欲譏韓子

題巨然泉巖老柏圖

金趙秉文

雪巖森危有老柏幾度寒泉漱秋月氣凌層空白日寒
根貫斷崖蒼石裂奔騰逝水送流光剝落古苔封老節
明堂未作棟梁材潦倒風霜半無葉何人曾次富泉石
巨然袖中董元筆崖傾岸絕無人見夜半移舟真有力

賢侯筆力今曹植氣象參天二千尺為迴筆力挽萬牛
頓覺煙嵐少顏色

題畫

明董其昌

雪柏霜松不記年從教千尺鬱參天邇來灌莽丰茸甚
畫史難迴造化權

八檜圖

宋王令

客有要我八檜吟手攜八檜圖來縣挂張滿壁揚可駭
眄顧左右同嗟嘆旁摹石刻署名狀各有憑附相資緣

或高相扶互倚礙或斷欲蹙猶支顛強枝拗回信有力
高榦復俯蛟蚪拳尋根及株逮條葉例不拔直皆旁偏
雷疲風休雲雨去蛇龍鬪死猶鈎纏安分爪角與尾鬣
徒見上下相蜿蜒不知生時竟何謂略不參類常木然
宜乎今古惑昧者搖擺舌吻歸之仙一尤盤拳老高大
傳云聃老由飛蹢當時駕鹿躡以上跡有町疇遺相連
多應蝎殘鳥喙啄不爾誕者強鑿錫聃能惑人已自幸
豈此上去能欺天借如聃功可升躍鹿亦何幸飛相聯

於中一本特甚異膚革逆理紐左旋傳云聃手所自樹
我知此語定鑿穿苟令實為聃老植推以天意猶可言
當年曷不紐以右若曰世為左道牽如何衆輒不省究
反重神怪令聃專乾坤中含萬品彙此獨自異誰舍旃
窮思竟慮莫可索欲世不惑誰能奪仙書虛荒喜誕妄
推說事理尤綿延世人一讀即化變日望飛奮相迷癡
豈非此木久樹此浸漬亦為異說遷故其形植與生死
時以異怪招驚憐先時世不蚤斤斧放其老大訛誇傳

當年同生好材幹半以直伐成燒燃憑妖附誕相樹立
卒自死活終完全葉枝凋疎不有蔭材直弗枉曲莫輟
不知留存護養者竟以何理惜不捐我有尺鐵大剛利
久已鑄斧磨山巔二無柯柄尚棄置嬾乞月桂求嬋娟
畫檜

元虞集

茅山多古樹此檜更長生鸛鶴棲來穩蛟龍化得成雲
深還近戶月落似聞笙千載如相見蒼然故舊情

題華氏瑞檜圖

明高啓

誰指牛眠處江山最靈氣鍾孤檜碧祥表五芝青影
動春雲亂香敷曉露零知君家種德曾讀墓前銘

題老檜圖

明姚廣孝

盤盤鬱蚪枝陰陰墜虹渚欲共水邊人時來聽風雨

題白石翁畫虞山古檜

明張淵

虞山老檜三株青斗壇半掩招搖星道人丹成化鶴去
三檜天矯飛龍形是誰手植經千載曾見昭明讀書在
幾迴天上葬神仙不獨人間變桑海古人今人繞樹行

古今人去樹長生乃知勁氣合元化不與凡木爭枯榮
長洲老石好異者百里攜杯遊樹下浩嗟天下有樹如
此無我去此樹何人圖三日經營雙眼力滿空蒼翠移
真跡鶴骨虬筋左紐文雷裂霜皴古秋色日暮袖歸歸
不得滿山風雨山靈惜居然贈與臥雲人長嘯寒風生
石壁於乎石君詩畫天下知此筆尤為天下奇勸君風
雷當掩戶恐化蛟龍擘雲去

題王學士所藏王孟端老檜蒼崖圖

明
曾 啓

王郎工畫妙入神平生強項世所嗔有時興至自盤礴
睥睨已喜傍無人忽然放筆作古檣白日煙雲倏暝晦
淋漓盡帶雷雨垂慘淡長疑鬼神會古藤纏絡枝相樛
屈鐵磔砢騰蛟蚪左擎右攫飛不去崖石欲裂山精愁
王郎一生何不遇五十得官嗟已暮胸中時吐氣崢嶸
半落蒼厓化為樹知君愛此長蕭森藏之願比雙南金
秋來恐有乘槎客泛入天河無處尋

題沈啓南畫虞山致道觀昭明手植三檜初名七

星檜

明
王世貞

白雲團虞山有七蒼虬舞云當梁初代昭明讀書所雖
干乾坤底實飽冰霜苦其四托孤鴟帝遣六丁取存類
矍圃三去殺秦封五宋人雅好事往往為之補頡頏若
昆季厥始實孫祖隆準理固當小巫氣終阻昨余游真
宮脫冠憩其下日落長風來颯然精靈語及乎微月上
修鱗森欲吐沈翁長康流為檜傳世譜不欲令漢傑輕

與噲等伍尺楮移秋山真宰在阿堵蓬牕一展看森陰
洗煩暑何必稱七星三星亦自古

古杉行

題陳兵曹所藏李遵道
畫靈隱道中二杉圖

元
傅若金

靈隱道中古杉樹上與雲霧相膠葛李侯一見為寫真
霜雪蕭蕭起毫末此杉蒼茫幾百年鬼物扶持人所憐
貞心豈容螻蟻蝕老幹或有蛟龍纏山林萬里那得致
見者皆驚棟梁器暗壁尋常度雨聲暗牕彷彿生秋氣
吾聞大厦衆力持此杉誰能久棄之君不見道邊不材

木擁腫百圍安所施

跋理宗題馬麟畫折枝木犀圖

元王惲

花中神品趙昌師又向臣麟見折枝不惜一天風露潤
百杯樓晚要新詩

題曹雲西桂根圖

元黃玠

何人操玉斧夜半緣青冥斫去月中樹千秋傷我情無
根亦云已有根當復生但笑吳剛者負此不義名

題江亭柳色圖

元丁鶴年

昔年醺酒地江漢一茅亭同會人何在東風柳又青

題吳宮衰柳圖

明袁凱

遠岬依依落日明吳王醉處少人行多情獨有垂楊樹
猶送深宮夜雨聲

題便面畫新柳

明李日華

雪消野水半融泥凍柳森森態未齊昨夜一番春雨好
淡黃金色滿湖堤

倣倪迂河橋新柳

明李日華

河上柳枝黃未勻綠波沄沄沙草春孤煙一聚遙山下
知有憑高送目人

題畫柳

明
董其昌

摸索芳菲度畫檐煙絲嫋嫋雨氤氳幽人無復靈和夢
太守風流自漢南

題自畫梧石

元
唐肅

縹緲未央闕角淒清長信宮門人起轆轤聲裏月在梧
桐石根

題梧石

明 劉 崧

鳴琴罷瑤席鶴夢清宵警涼月下前除照見梧桐影

題浦人畫梧桐竹石

明 程本立

錦石成山花滿川子孫一旦鬻平泉疎篁古樹蒼厓雪
茆屋看來已百年

題梧竹奇石圖

明 桑 悅

琴瑟未斲先具形簫管未截終完聲天將碧玉為寸筵
拊擊翠石石亦鳴分明一部真韶樂彩鳳能招下寥廓

古音不復將何如請君看此韶樂圖

題浦舍人梧竹圖

明趙迪

吾懷出塵想飛思凌滄洲湘江夜來雨寒色川上浮涼
飄金井夕露滴銀塘秋故人隔千里對此空離憂

畫樹後呈濬師

唐劉商

翔鳳邊風十月寒蒼山古木更摧殘為君壁上畫松柏
勁雪嚴霜君試看

于祕校示郊園棠木連理圖偶題長句

宋
劉叔贛

昨得伴圖與賦詩野棠并榦上交枝始疑和氣偏回復
可是常情悅附離愛樹去思吾豈敢高門陰德子應知
濟南固有終軍辯傳布仍煩老畫師

畫樹

元
馬祖常

寒槎偃蹇風雨攻蟄龍啣雲礧石根戰壘防秋鹿角柵
長筏浮江下蜀門憶昔馳射古楚原夜觀野火燒楓林
高堂醉酒看畫幅樛枝薜蘿牽我心

題惠崇畫樹林

元馬祖常

下瀨生秋響平林漏曙光蜀榿陰十畝閩荔熟千房不
聽樵夫伐無勞匠石傷靈槎上天漢全棟架明堂黯黯
雲垂幔淋淋雨濕牆鴈奴呼伴審鳩婦擇棲詳路遠逢
仙宅天低近帝鄉春行苔履滑夕坐筍書香東絹刀誰
剪西園價爾償懸車清渭後白髮灑蒼涼

題初士元所畫雙樹圖

元釋良琦

梁溪溪上曉揚舫吳人竹枝自可聽不得回船繫厓石

寺門松樹為誰青

題陳大宅方壺子層層雲樹圖

明周玄

昔年曾記秦川客
雲樹參差去欲迷
日暮孤舟行不盡
鷓鴣啼過渭城西

百樹送青六景

為鄭侍御題

明魏時敏

石罅無樵採
春深剝綠苔
孤雲將暝去
羣樹送青來
晴靄琴書潤
陰森鳥雀回
醉吟看不厭
何處有蓬萊

癸亥五月寫江干七樹

明李日華

蕭疎交遠波歷落無行次未論材不材偃蹇各自恣

陳仲美夏木圖

明張羽

董元夏木不復見俗本紛紛何足觀陳郎筆力能扛鼎
寫此千章生晝寒陰森似有神靈會偃蹇直作蛟螭蟠
天雞曉鳴清籟發木客夜度雲旂翻林下文人行杖藜
石根葉落失舊蹊孤童襦被向誰宿山風蕭蕭日薄西
商巖紫芝自可食武陵桃花原易迷人間瀕洞不可處
莫畏虎嘯并猿啼

祝孝友作枕屏小景以霜餘茂樹名之因題此詩

宋朱子

山寒夕飈急木落洞庭波幾疊雲屏好一生秋夢多

許道寧寒溪古木圖

元元好問

道人醉袖蟠蛟龍埽出古木牙須雄開卷颯颯來陰風
翟卿論畫凡馬空能知畫與詩同宗解衣盤礴非衆工
遺山筆頭有關全意匠已在風雲中留待他日不匆匆
海岸古木圖

元王惲

古木螭蟠鬱有華輪困奇崛欲誰誇何年海藏龍宮使
推出秋風八月槎

畫古木

元馬祖常

桑空河上生賢相楓老山中化羽人未借九關當地軸
還曾八月上天津雷燒桐尾琴材古玉刻龍形劍具新
雨蝕蒼皮苔護石泉春玉乳月翻輪東隄楊柳春煙暖
西浦芙蓉曉露勻偃蹇孤根巖壑氣我知棫樸不為薪

題畫古木

元虞集

高秋木落洞庭空
岳陽城南多晚風
蛟龍夜護玉壇古
劍影長留明月中

畫古木

元虞集

荒郊臥蒼苔
蛟龍在其上
不知風雨來
垂影一千丈
後主撥鐙法
江南久寂寥
空令沒骨畫
容易媚中朝

商德符畫幽篁古木

元虞集

湘君宮在洞庭湖
幽篁古木龍所都
石壇雨長碧
苔蘚水屋風動青
珊瑚老人敲枕看
螻蟻嫠婦停舟聽
鷓鴣

江南蜀道問來往商公商公今有無

王晉卿古木

元楊載

走根坼裂石曲榦漸清漣雷電忌交作化龍起重淵
題王若水為仙都宮主趙虛一畫蒼厓古木圖

元柳貫

金門羽客住仙都玉立蒼宮五大夫微月滿空笙鶴下
一林秋影散龍胡

題山莊所藏東坡畫古木圖

元歐陽玄

眉山昔日生三蘇一山草木為之枯後來筆端挾春腴
却令生意回枯株樹經公筆無老醜天以春工付公手
誰云筆行龍眠翁奚必法嗣洋州守山莊劉氏富清玩
家有蘇公舊揮翰恍驚濕蘚粘怪石慣見倒根生斷岬
涪翁對此煮春茶為公梢上挂長蛇燈窗細讀假山記
秀氣終屬眉山家

奉題達兼善御史壁間劉伯希所畫古木圖

元
傅若金

遠樹含幽姿近樹亦古色水傍嘗見畫不得乃在君家
中堂之素壁青林寂寞行人窈白澗微茫斷煙隔入門
蕭蕭雲氣生落日便恐歸禽爭耳後颭夾寒風聲知君
夜眠愁雨黑留客晝坐宜秋清劉侯學李成畫手稱獨
步時見作古松盤屈百怪聚一作任
形勢中林一株直且良
安得劉侯寫其趣一作安得揮
毫縱奇氣

題趙仲穆怪石奇木

元張翥

君不見岳陽城南老樹能化人又不見草中巨石如臥

虎樹逢仙客授還丹石誤將軍箭飛羽海寧太守提健
筆與丹通靈箭角力山精木魅寒暄賜千年醜怪匿不
得樹瘤半裂雷火出隱入雲綃露奇跡猝然一見心膽
驚氣盡畫工俱辟易挂之高堂風動搖古色一片秋蕭
蕭待侯硯池卷東海歸寫扶桑與沃焦

息齋竹石古木

為會稽韓
季博士題

元張翥

老竹葉稀多禿枝新竹碧潤含幽姿籜中龍子振春蟄
突出雷雨頭參差傍蹲怪石石罅裂裂處恍惚疑龍穴

山中有樹皆十圍活幹撐青死槎折霜皮蝕盡乾蘚文
半頂斬立雙極分最後一枝身出羣垂枝倒走陰崖雲
李侯標致不可得小字親題別塗黑縱橫不在摩詰下
蕭爽直與洋州敵玉堂學士欣見之濃墨大書真崛竒
森然一片鐵石筆妙甚七字瓊瑰詞此詩此畫今兩絕
把翫微風動毛髮只應真宰泣凋鏤一夜山牕冷秋月

題怪木圖

元貢師泰

千年老樹化青牛風雨空山不盡愁一日爭迎作神主

踏歌槌鼓水西頭

鄭禧之古木圖

元 鄭元祐

吾宗有子擅風流履行只如陳太丘復向仇池寫林薄
六月陰森如凜秋前修凋零吾亦老落日孤雲生晚愁
夜作古木怪石因題

元 倪瓚

夜遊西園渚初月光炯炯徙倚巖石下愛此林木影
為何彥修題縣厓古木圖

元 劉永之

古木蒼蒼帶女蘿峰陰斜蘸石潭波十年不到屏風疊

夜雨茅檐幽夢多

題古木幽篁圖

元 劉永之

近者天下寫竹枝息齋子昂最奇絕金釵折股錐畫沙
直以高情寄豪墨後來小李用家法更覺縱橫脫羈勒
御榻屏風或詔寫流落人間豈多得我家真蹟兼數公
錦囊玉軸複壁中舊宅荒涼經戰伐故物多隨煙燼空
此圖尋丈小李作位置頗殊標格同半身古樹色蒼潤
簣簴因依相澹濃長林無人秋氣入蜿蜒蛇蛟起幽蟄

蟪蛄垂絲晝陰靜老鶴刷翎昏雨集黃陵廟前湘水深
捐袂江皋思俯拾浮槎尋源遡空闊折旌低渡玄雲濕
何郎兄弟最好竒愛此不減珊瑚枝幽居正在蘭峰下
亦有喬木當牕扉共展長圖幽興發六月涼颼生葛衣
還君珍襲增歎息他日重看覓舊題

雲林古木

元唐肅

石上清陰走怒螭一身都著薜蘿衣若為借得靈槎坐
去訪銀河織女機

題郭天錫畫古木

元 張天英

木落空山憶五君，
髯虬飛影拂玄雲。
幾夜煙蘿月中立，
醉歌如見郭將軍。

畫古木幽篁

元 丁鶴年

石海珊瑚樹，
清湘翡翠毛。
無因將寄遠，
日暮寸心勞。

怪木竹石圖

明 施敬

大星墜地光如日，
一夜海風吹作石。
精衛魂驚不敢窺，
留待媧皇補天極。
石傍老樹枯槎枒，
古藤屈曲懸脩蛇。

鷓鴣踏翻黃竹葉翡翠啄破蒼苔花千年醜怪何人識
老剛甯次真奇特興來掀倒墨池波鬼跡神踪不能匿
生綃颭颭搖秋颺古色慘淡寒無姿天吳拔斷蛟龍尾
月露洗出珊瑚枝張公好古耽清賞狂客題詩真技癢
冥驅萬象入毫端便覺蕭韶畫中響琅玕有寶石可棲
赤霄靈駟來何遲按圖為君三歎息雷雨打門風捲席

古木寒藤圖

明沈周

古木迸石出脫葉如無生羣篠自西風何以荅秋聲蒼

藤載束縛恐因雷雨行我詩向而書誓與同老成

郭熙畫木

元虞集

江南喬木已無多誰畫參天鐵石柯記得玉堂春畫永
寒林坐對老東坡

御定歷代題畫詩類卷七十三

欽定四庫全書會要

御定歷代題畫詩類卷七十四目錄

樹石類

子瞻畫枯木 宋孔武仲

題過所畫枯木竹石 宋蘇軾三首

子瞻與李公麟宣德共畫翠石古木老僧謂之憩

寂圖題其後 宋蘇轍

西軒畫枯木怪石 宋蘇轍

和謝公定觀祕閣文與可枯木

宋陳師道

題子瞻枯木

宋黃庭堅

子瞻寺壁作小山枯木

宋黃庭堅

求郭侍禁水墨樹石

宋黃庶

題莫壽朋內翰所藏東坡畫枯木圖

宋孫覲

同趙伯充觀東坡畫枯木

宋僧道潛二首

西湖酒家壁畫枯木

元宋元

題楊友直檢校所藏李營丘枯木圖

元虞集

題高彥敬樹石圖 元趙孟頫

枯木圖 元貢性之二首

題李成枯木 元張天英

李士弘枯木風竹圖 元劉因

墨石枯木 元傅若金

題趙承旨枯木竹石圖 元馬祖常

子昂枯木竹石圖 元袁桷

題李遵道枯木竹石圖 元李孝光

趙汝甫枯木竹石卷

元李孝光

題李息齋枯木竹石圖

元丁復

宣和畫木石

元黃潛

題趙文敏公木石有先師題於上

元張翥

題棘石圖

元王翰

李遵道枯木竹石圖

元黃鎮成

倪元鎮古木竹石

元鄭元祐

趙集賢枯木竹石

元張憲

枯木竹石 元貢性之

枯木竹石 元丁鶴年

為吳處士畫喬林礪石 元倪瓚

題倪雲林枯木竹石小景 元陶宗儀

題枯木竹石 明劉崧三首

枯樹圖歌 明劉基

吳仲圭枯木竹石 明高啓

題枯木竹石 明王紱

題枯木竹石

明鄭珞

枯木圖寄許士修

明方孝孺

題李營丘枯木圖

明唐文鳳

題枯木竹圖

明陳憲章

枯木竹石圖

明劉溥

劉時用枯木竹石

明劉珥

寫枯木幽篁

明張寧

題趙魏公木石圖

明王禕

題徵明寫贈潘崇禮灌木寒泉大幅 明祝允明

枯木竹石圖 明姚綬

題枯木竹石 明朱純

題王叔明枯木竹石 明高得暘

枯木竹石 明李廷儀

題喬柯秀石 明張鳳翼

倣倪迂寫林亭秀石 明李日華

題畫草木奇峰 明王景彰

畫石 唐劉商

畫石 宋白玉蟾二首

孫懷悅紙本亂石 宋文同

題孫舜俞府判瑞石圖 宋楊萬里

題劉才卿湖石扇頭 元元好問

宣和寶石圖 元王惲

趙氏宗室畫水石 元馬祖常

題柯敬仲博士畫石 元錢惟善

題方壺水石圖

明詹同

題畫石

明張濬

題畫

元華幼武

題畫

明王慎中

題史癡翁畫

明盛時泰

題畫贈楊玄蔭大參

明董其昌

扇圖

明徐渭

欽定四庫全書薈要卷一萬九千一百八十二

集部

御定歷代題畫詩類卷七十四

樹石類

子瞻畫枯木

宋 孔武仲

寒雲行空亂春華西風凜凜空吹沙夫子抱膝若喪魄
誰知巧思中萌芽敗毫淡墨任揮塗蒼莽菌蠢移龍蛇
略增點綴已成就止見枯木成槎枒更無丹青相掩翳
惟有口鼻隨穿呀往來江湖飽觀

闕一
字

或在山隈溪水

涯腹中空洞夜藏魅巔頂突兀春無花徑深最宜繫畫
舸日落時復停歸鴉蘇公早與俗子偶避世欲種東陵
瓜窺觀盡得物外趣移向紙上無毫差醉中遺落不祕
惜往往流傳藏人家趙昌丹青最細膩直與春色爭豪
華公今好尚何太癖曾載木車出岷巴輕肥欲與世為
戒未許木葉勝枯槎萬物流形若泣露百歲俄驚眼如
車樹猶如此不長久人以何者堪矜誇悠悠坐見死生
境但隨天機無損加却笑金城對宮柳泣然流涕空咨

嗟

題過所畫枯木竹石

三首

宋蘇軾

老可能為竹寫真小坡今與竹傳神山僧自覺菩提長
心境都將付臥輪

散木支離得自全交柯蚴蟻欲相纏不須更說能鳴鴈
要以空中得盡年

倦看澀勒暗蠻邨亂棘孤藤束瘴根惟有長身六君子
依依猶得似淇園

子瞻與李公麟宣德共畫翠石古木老僧謂之憩

寂圖題其後

宋蘇轍

東坡自作蒼蒼石留取長松待伯時只有兩人嫌未足
更收前世杜陵詩

西軒畫枯木怪石

宋蘇轍

西軒素屏開白雲婆娑老桂依霜輪顧兔出走蟾蜍奔
河漢卷海機石蹲牽牛自載倚桂根清風颯然吹四鄰
東坡妙思傳子孫作詩髣髴追前人筆墨墮地稱奇珍

閉藏不聽落泥塵老人讀書眼病昏一看落筆生精神

和謝公定觀祕閣文與可枯木

宋陳師道

斯人不復有累世或可期每於丹青裏一見如平時壞
障塵得入慘澹令人悲墨容落欲盡巖顏終不移朽老
萬餘年石心烏銅皮念此猶少作未盡冰霰姿北枝把
異鵲意定了不疑惜哉不得語宵次幾興衰一為要貴
役可復辭畫師隱奧雖可惜塗抹復見遺謝侯名家子
感慨形苦詞豈惟語畫工勁特頗似之何當補諫列一

吐胃中奇

題子瞻枯木

宋 黃庭堅

折衝儒墨陳堂堂書入顏楊鴻鴈行
胃中元自有丘壑故作老木蟠風霜

子瞻寺壁作小山枯木

宋 黃庭堅

海內文章非畫師能回筆法作枯枝
豫章從小有梁棟也似鄭公雙鬢絲

求郭侍禁水墨樹石

宋 黃 庶

塵埃典却林泉閑家夢夜夜歸雲端知君弄筆欺造化
乞我幾株松石看

題莫壽朋內翰所藏東坡畫枯木圖

宋
孫覲

龍筋鶴骨老摧頽百尺修圍折巨雷倦鵲飛來望百繞
踏枝不著又驚回

同趙伯充觀東坡畫枯木
二首
宋
僧道潛

經綸志業終不試晚歲收功翰墨林偶向僧坊委陳迹

每經風雨聽龍吟

蕭然素壁倚枯枝
行路驚嗟況所思
惆悵騎鯨天上去
却來人世恐無期

西湖酒家壁畫枯木

元宋元

衡岳喬松道途遠
成都古柏山川隔
忽驚老樹刺眼來
疑是頽崖壓東壁
拗怒風雷龍虎氣
盤摺造化乾坤力
陰連滄海一片秋
秀奪西湖兩峰色
寒雲冉冉惹靈晝
影凍蘚綠泂借春
碧醉翁睥睨欲挂
衣禪伯經營思鰓
錫

烏鳶冥下踏枝空
猿猱夜過嗔藤仄
鐵榦銅柯嗅不香
蒼雪玄煙潤將滴
便擬攀蘿解糾纏
何須平地生荆棘
直須埽去曲碌姿
揮作昂霄數千尺

題楊友直檢校所藏李營丘枯木圖

元虞集

老龍出海蒼髯鬚
營丘枯木天下無
回枝屈鐵墮崖雪
澗底應拾青珊瑚
明堂清廟要梁棟
朔風吹沙澤腹凍
老身不用歎遲莫
按圖來求萬鈞重

題高彥敬樹石圖

元 趙孟頫

喬木動秋風
索索葉自語
堂堂侍郎公
高懷政如許

枯木圖 二首

元 貢性之

湖石東頭太液西
春風宮樹半高低
王孫金彈多如雨
不著黃鸝一箇啼

翠蘿牽恨引絲長
黃葉將風戰曉霜
莫怨一枝棲未穩
上林春樹近昭陽

題李成枯木

元 張天英

誰知惜墨李營丘
屈鐵交柯煙雨稠
記得滄江龍出蟄
怒鬚捲霧拔山湫

李士弘枯木風竹圖

元 劉 因

狂蛟舞空蒼髯拳雙鐵
蒙頂雲交加亭亭霜標不受侮
慘澹天籟枯槎牙
西山古淵人莫測
一柱承天萬牛力
會須截玉化陂龍
拂拭苔光遺劍跡

墨石枯木

元 傅若金

人傳月中樹
恐是山河影
片石補天餘
參差碧雲冷

題趙承旨枯木竹石圖

元 馬祖常

猗歟太史諸王孫生綃畫出崑崙根枯槎菌蠢厄野火
淇園秋雨琅玕繁天寒歲暮碣石館囊書日見玄雲翻
持向故山茅屋底倚看屈曲大江奔

子昂枯木竹石圖

元 袁 桷

亭亭木上座楚楚湘夫人因依太古石融液無邊春

題李遵道枯木竹石圖

元 李孝光

謫仙夜入雷電室捕得飛來石上梭却斫靈查挂明月

橫吹玉笛上天河

趙汝甫枯木竹石卷

元 李孝光

中林黃葉淨
沍沍眼底崢嶸見
此君清曉東池看
黃菊
鳳毛無數落春雲

題李息齋枯木竹石圖

元 丁復

霜柯洞庭寒
露葉渭川冷
幽人美清夜
獨寫秋燈影

宣和畫木石

元 黃潛

石邊古木尚青枝
地老天荒石不知
故國小臣誰在者

蒼梧落照不成悲

題趙文敏公木石有先師題於上

元張翥

吳興筆法妙天下人藏片楮無遺者南陽詩律動江湖
一篇才出人爭寫二老風流傾一時至今傳畫仍傳詩
清涵月露秋見影黑入雷雨寒無姿仇山黃鶴去不返
苔溪鷗保歲俱晚好呼鐵爪夜錚錚刻向青珉照人眼

題棘石圖

元王翰

烈風號中林極目盡荊棘離離寒月秋莽莽古原夕冥

鴻振高翮鵠翳深跡奈此貞固姿蒼茫更秋色

李遵道枯木竹石圖

元黃鎮成

老樹槎牙倚半空蒼筠葉葉帶秋風欲將歲晚論心事
遙憶美人江水東

倪元鎮古木竹石

元鄭元祐

雲林子外生死解內疚為天使帶經而鋤倦即休亦復
拈筆為林丘樹枝鱗皴崖石齒若有人兮在空谷招之
不來兮雲慘瘁以令人愁

趙集賢枯木竹石

元張憲

槎牙老樹響天風
寂歷幽篁泣露叢
惆悵玉堂舊公子
故家陵廟月明中

枯木竹石

元貢性之

怪石犖确厓谷深
涼風蕭瑟蒼雪陰
美人何處解長佩
湘波澧水勞余心

枯木竹石

元丁鶴年

青天騰一蛟
白日臥雙虎
何人歌竹枝
遙隔瀟湘浦

為吳處士畫喬林礪石

元倪瓚

山家日出無行踪
雪樹煙蘿遠且重
不見鹿眠磐石上
提壺自挂一長松

題倪雲林枯木竹石小景

元陶宗儀

蒼玉庚庚翠袖扶
墨池洗出碧珊瑚
倪顛老去風流盡
只有雲林小畫圖

題枯木竹石

三首

明劉崧

曾聽楚人歌竹枝
橫江秋靜月明時
只今漂泊春風裏

綠滿南園總不知

平沙竹樹晚毵毵
楚客維舟近峽南
忽憶微雲將雨過
滿林秋色照江潭

木葉欲脫天雨霜
竹枝乍低風已涼
三湘落日流波白
行子繫船思故鄉

枯樹圖歌

明劉基

道傍古樹身半枯
白蟻穴根蟲穴膚
風推雨撼霜雪凍
斷石蹉跎無人扶
憶昔勾芒肇初政
百卉騰達隨呵噓

新柯在舊柯壯霧露膏沐光如濡黃鸝翡翠語嬌滑
桑扈戴勝鳴相呼白鶴來巢鹿止蔭匠石愕睨爭歎譽
寧知憂患生旦夕野火倏忽起不虞燎原烈焰難嚮邇
孰問柞櫟杉與檣枝燔葉歛根半赤朽腐瞞液非時須
山林搖落歲方晏聊以薜荔為衣袂嗚呼廣廈棟梁具
委棄草莽同薪芻皇天未必替生意更盼玉燭回陽烏

吳仲圭枯木竹石

明高啟

叢篠倚喬柯秋陰雨尚多風霜莫搖落留蔭石邊莎

題枯木竹石

寄李公寶

明王紱

菴畫溪邊水拍隄繞隄高樹倚雲齊
君家正在樹深處滿地綠陰山鷓啼

題枯木竹石

明鄭珞

湘靈夢斷湘雲夕涼葉蕭蕭瀉秋碧
君山半夜風雨來萬頃波中老龍泣

枯木圖寄許士修

明方孝孺

春到已多時幽禽尚未知上林無限好
何事立枯枝

題李營丘枯木圖

明唐文鳳

營丘枯木天下無筆端造化何榮枯想當磅礴欲畫際
天為逐興神為驅鄧林已化防風骨滄海乍出珊瑚株
良材何異徂徠產大用不值明堂需自憐形質赦斤斧
豈歎薪爨供樵蘇萬牛回首力未許獨匠指顧心難圖
空遺偃蹇蔽村野白石鑿鑿泉鳴鳴枯梢似挂瘦蛇影
亂葉恍茁乖龍鬚我生本是山澤臞隱居林樾同凡夫
昂霄聳壑日在望號雨呼風時與俱只今廊廟重締構

梗楠杞梓當貯儲按圖工師儻所取意營目盼增嗟吁

題枯木竹圖

明陳憲章

美節晴欺雪殘株冷謝春因知名畫手不是狗時人

枯木竹石圖

為趙行恕作

明劉溥

露華洗濕江上秋美人不來生別愁洞庭瀟湘隔千里
兩岸白雲如水流碧空茫茫九疑道君山一點青螺小
鷓鴣啼斷竹枝寒鳳凰飛去梧桐老

劉時用枯木竹石

明劉珣

蒼龍夕挂千尋影彩鳳朝聞十里音月夜風朝我曾見
太湖石畔蘚痕深

寫枯木幽篁

送陳大用

明張寧

方洲秋日景荒涼古木幽篁徧草堂寫入溪藤送君去
情隨疎影共斜陽

題趙魏公木石圖

明王禕

朝罷鑾坡春晝閑籀書飛白恣揮翰多因遺墨淋漓後
寫作虛篁木石看

題徵明寫贈潘崇禮灌木寒泉大幅

明 祝允明

具區之水被三州洞庭之樹千萬數沉森浩漭天下奇
灌木寒流此何許潘君抱朴山水人策杖行徧滄浪濱
陽崖衆目悅暄媚忽逢陰壑如有神禹鎖老龍鐵索絕
拏雲怒雨出洞穴木號水呼竹石裂衆蛇從之互盤結
蛻骨戍削雜鱗鬣颼颼風葉枸株檠急流抨撞石罅躍
珠跳汞走鬪澆潑微茫上析河漢注奔赴旁繞方丈脚

山鬼伏窺木客泣欲據恐被山伯扶仙老時下憩濯足
而晞髮招潘君兮吾子來共千歲以一息潘君歸語衡
山氏仙之人兮不可以久留吾恐一往境俱失宣州兔
肩之毛勁如石深醺金壺玄玉液閉門夜半役鬼工倏
忽移來宵無迹

枯木竹石圖

明姚綬

秋風吹空古樹葉白雨低壓新竹枝淨埽石頭看霽色
滿襟涼影鬢絲絲

題枯木竹石

明朱純

槎枿老樹根盤錯翠筠靜倚荆山璞奇材異寶世豈無
却抱真姿隱巖壑卞璵不可作伶倫難再逢吁嗟世俗
久聾聵高枝瑞鳳徒邕邕

題王叔明枯木竹石

明高得暘

吾鄉畫手鶴山樵鶴去山空不可招真跡幸留王宰石
疎篁老樹共蕭蕭

枯木竹石

明李廷儀

渴龍飲海海水枯稜撐怪石雲模糊媧皇不用補天漏
長留對此珊瑚株珊瑚十丈插雲表氣勢高壓扶桑曉
晝長清氣寒欲凝一天涼思秋冥冥須臾鳳鳥西飛去
九疑對面何青青

題喬柯秀石

明 張鳳翼

怪石嶙峋虎豹蹲蚪柯蒼翠蔭空村亦知匠石不相顧
閱歷歲華多蘚痕

倣倪迂寫林亭秀石

與修 閣

明 李日華

橋平來穩步亭小著閑身此地清吟者應非食肉人

題畫草木奇峰

明 王景彰

蒼蚪飛上天鱗鬣隆深麓長風吹不起散作千年綠

畫石

唐 劉商

蒼蘚千年粉繪傳堅貞一片色猶全那知忽遇非常用
不把分銖補上天

畫石 二首

宋 白玉蟾

一片嵯峨墮碧空嶽嵒歷落最玲瓏從教把翫真堪醉

疑自當年栗里中

直作壺中九華看
碧于簪玉小于拳
好藏莫便令人見
恐有癡情似米顛

孫懷悅紙本亂石

宋文同

孫老抱奇筆
臨紙恣揮灑
從頭埽亂石
礫砢隨墨下
焦頑與圓潤
無一不精者
誰信萬鈞重
卷之不盈把

題孫舜俞府判瑞石圖

并序

宋楊萬里

廬陵治中孫昌言字舜俞居越之諸暨縣作祭享之

亭於龜浦雞冠山先龍圖之瑩得石剖之中有文如
松桂枝葉可數圖之以示士大夫賦詩者甚衆來求
予詩因為賦之

雞冠山青龜浦碧松桂捎雲三萬尺何年星竇化為石
風吹未凝冰玉色仙人擘開光燭天山下人家夜不眠
松花桂子落如雪飛入石中堅似鐵石中種樹人不知
石中生樹人始奇君不見只今瑞圖滿四海騷人詩卷
牛腰大

題劉才卿湖石扇頭

元
元好問

幽澗雲凝雨未乾
曲池疎竹共荒寒
扇頭喚起西園夢
好似熙春閣下看

宣和寶石圖

元
王惲

浮雲萬態煥金書
染出湖光照坐隅
不道漢家規制遠
泰山磐石是基圖

趙氏宗室畫水石

元
馬祖常

生平已識趙王孫
竹素何年畫石根
萬里南雲秋似水

直容艇子到柴門

題柯敬仲博士畫石

元錢惟善

石逾玉潤不生苔
鐵笛吹殘自裂開
絕似雨晴炎海上
一雙翡翠忽飛來

題方壺水石圖

明詹同

古壁之間屋漏痕淋漓
元氣凝清渾道人山中守龍虎
十日不見煙塵昏拂拭填作一枯木
下有碎石分崑崙
斷劍插入怪厓底老蛟迸出秋雲根
神君怒立被玄髮

欲騎鐵驥超天門當時揮灑妙莫測鬼物驚走如星奔
青城仙伯絕筆久覩此髣髴其人存玄同隱者臥松雪
得畫遠寄來江邨却憶麻姑洞口樹使人一夜勞心魂
授簡何年訪穀城叱羊無地覓初平曾如艤棹瀟湘晚
水落空江山月明

題畫石

明張濬

題畫

元華幼武

霜柯起涼飈苔石帶寒雨一片林壑姿翛然不知暑

題畫

明王慎中

繡壁峻嶒森怪立，虬松夭矯相攫執。脩髯怒甲爭奮躍，灑淅疑乘風雨入。葛蘿蒙密晝長陰，雲氣淋漓晴亦濕。複磴兼藏嵌竇深，空林恍聽濤聲急。在谷幽人不可招，白日此中容易匿。

題史癡翁畫

明盛時泰

老樹槎牙鐵作柯，亂竹縱橫拂雲起。誰知一段秣陵秋，寫在癡翁半邊紙。癡翁癡翁蓬萊精，有時拈筆人皆驚。

想見臥癡樓上景狂歌醉舞鳴秦箏我本大城山裏客
看君圖畫來君宅出門却被強題詩坐對疎棚荳花白

題畫贈楊玄蔭大叅

明 董其昌


嘉樹森梢一百章藤陰蒙翳午生涼祇因較勘高僧傳
却誤松牕鶴夢長

扇圖

明 徐渭

渺渺平沙四望通天涯雙樹立秋風畫工不解寒鴉意
寫入隋堤綠柳中

御定歷代題畫詩類卷七十四



總校官庶吉士臣侍朝

校對官庶吉士臣徐如澍

膳錄監生臣張耀臺